

# Chèques-services an aner biirgerfrëndlech Dingschtleeschtingen

Et ass jo schéin a gudd, dass eis Regierung emol endlech Neel mat Käpp mecht, fir d'Elteren beim Kannerversorgen ze ënnerstetzen.

Chèques-services, Maisons relais, Crèches, Précoce – dat ass jo alles schéin a gudd. An an e puer Jor soll dat esouguer alles gratis sinn. Nach besser!

Obwuel, wann een dës Deeg den Artikel an der Press gelies huet, wou d'Meenungen ganz gedeelt driwwer waren, ob et dann elo gudd oder schlecht war, dass di franséisch Ministesch, d'Madame Dati, fénnef Deeg no hierem Accouchement (an och nach per Kaiserschnëtt!) schon erëm hiere politische Flichter nogaangen ass, da sollt ee villäicht och driwwer nodenken, dass an deem Beräich dies „Gudden“ net zevill gemaach gëtt. Frankräich gëtt jo gären als Ideal a punkto effendlech Kanner-Betreiungsstrukturen duergestallt; allerdings hu bei enger Ëmfro iwwer 70% vun de Fraen zouginn, dass si sech eigentlech gären mindestens ee Jor oder esouguer nach méi laang selwer géifen ëm hier Kanner këmmen, mee dat de sozialen Drock, esou séier wéi méiglech erëm an d'Berufsliewen zrëckzekommen, immens héich ass.

Wëlle mir hei am Land esou eng Situation?

An anerer Hinsicht sollte mer eis awer emol onbedingt eng Nues voll huelen bei eisen Noperen.

Ech schwätzen hei vun den „Aides à domicile“ (net vun deenen, déi d'Flegeversécherung mat extremer Knéckegkeet accordéiert), mee vun dem Personal, wat een als Privatperson kann engagieren, fir am Stot ze hëllefen oder eeler Leit ze versueren, wann d'Leeschtingen vun der Flegeversécherung net duer ginn oder carrément refuséiert ginn, obwuel Bedarf besting.

Do brétt eise Stat sech jo gären dermat, dass mir zënter Joren eng ganz einfach Procédure hätten, fir déi Leit unzemelden.

Dozou sief emol fir d'ëischt gesot, dass déi Procédure nach ëmmer vill ze vill komplizéiert ass, besonnesch wann een heefeg Krankmeldungen huet, déi



„En anere Problem ass am Krankheitsfall en Ersatz ze fannen“

Photo: LJ-Archiv

een da muss schréflech melden a wochelaang op de Remboursement vun Loun warden, deen een aus der eegener Täsch muss virstrecken. An och d'Oofmeldung, wann een eng Botzfra muss entloossen, ass räichlech komplizéiert: Net emol bei den „Assurances sociales“, mee haaptsächlech wann d'ADEM engem e Koup Paperasse schéckt fir auszufüllen, wou een nëmmen d'Halschent versteet, wat do gefrot gëtt, da vergeet engem d'Loscht, seng Botzfra nach unzemelden.

En anere Problem ass, am Krankheitsfall en Ersatz ze fannen. Praktisch onméiglech!

Ausserdeem ass jo bekannt, dat kaum e Mënsch eng Aarbecht als Aide à domicile als Liewensaufgab betruecht: Wann een eng gudd Hëllef fonnt an ugeléiert huet, dann ass se fort, esoubal si irgendwou e Fulltime-Job ugebuede kritt.

Dann heescht et neess, kléng Annonce verëffentlechen, warden bis een oder méi Kandidaten sech melden. Vüstellungsgesprécher arrangieren, an dann dee beschte Kandidat alt neess uléieren, well jiddereen vun eis huet jo séng eegen Manéier, wéi en d'Aarbecht gäre gemaach hätt. D'Botzfra huet villäicht bei sech doheim d'Gewunnecht, d'Schong op de Kichendesch ze stellen fir de Buedem ze wäschen, en aneren fénnt dat awer total onhygienesch.

Wann Der awer elo méngt, et wier villäicht eng gudd Iddi, lech un eng professionnel Botzfirma ze wenden,

da sidd Dir och schief gewéckelt: Déi sollen zwar derfir suergen, dass och am Krankheitsfall vun der enger Botzfra en Ersatz geschéckt gëtt, fir dass d'Aarbecht net wochelaang leibleift, mee wann Dir lech iwwer d'Präisser vun de Botzfirmen renseignéiert, da kritt Dir e Schock: Ënner 20 Euro d'Stonn ass keng ze kréien! A wann Dir trotzdem eng Botzfirma engagéiert, da loossen déi lech och ganz séier setzen, wann Dir hir Service nëmmen e puer Stonne pro Woch braucht: Déi sinn eenzeg an eleng u grouse Firmen interesséiert, wou si hier Equipe all Dag fir e puer Stonnen kënnen hischécken.

An de Combel derbäi ass: Obwuel jo dodurch, dass Privatleit hiert Personal iwwer eng Firma géifen engagieren, och Aarbechtsplazen geschaf géife ginn, kënnt Dir d'Rechnungen vun der Botzfirma net vun de Steieren oofsetzen! Den Montant déductible vu maximal 3.600 Euro géllt nëmmen fir Personal, wat ee selwer ugemellt huet. Wéi mer méi wäit nach wäerte gesinn, ass dee Montant iwwrigens räichleg mickreg am Vergläich zu deem, wat een an eisen Nopeschlänner ka vun de Steieren oofsetzen!

Am Frankräich, an der Belsch an och an Däitschland ginn et Firmen, déi sech – deelweis esouguer vun Stat gefördert – drop spezialiséiert hunn, Privatleit ze ënnerstetzen, net nëmmen bei Haushaltsaarbechten, mee och bei allen anere Problemer, wou een Hëllef brauch, déi hei am Land

héchstens vum C.I.G.L. fir al an handikapéiert Leit ugebuede ginn oder vun Servicier déi nëmme bezuelbar sinn, wann d'Flegeversécherung se matfinanzéiert.

Dat Ganzt funktionnéiert bei eisen Noperen ouni bor Geld, mee mat sougenannten „titres-services“, déi ee bei autoriséierten Firmen ka kafen esou wéi een an der Schwemm oder am Fitnesscenter e Carnet keeft wou een da bei all Besuch een Ticker draus ofgëtt. Deelweis funktionnéiert dat jo och schon hei am Land mat den „chèques-repas“. Bei den S.A.P. (service à la personne), wéi d'Fransousen et nennen, gitt Dier einfach der Botzfra oder dem Gärtner fir all Aarbechtsstonn esou e Scheck, deen hien bei där Firma, déi hien oder si bezuelt, ooffiwert.

Wat kaschten esou Dingschtleeschtingen am Ausland?

16 Euro pro Stonn freet eng franséisch Firma, de Stat iwwerhéllt awer 50% bis zu engem Maximum vun 12.000 Euro, woubäi nach 1.500 Euro pro Kand oder Persoun vun iwwer 65 Jor derbäi kommen, esou dat am Frankräich eng Botzfra lech nëmmen 8 Euro pro Stonn kascht, ouni Steieren oder Sozialaaschten well déi gi vun der Firma iwwerholl, déi d'Personal zur Verfügung stellt. Och an der Belsch kascht eng professionnel Hëllef nëmmen 7 Euro respektiv 4,69 Euro netto well de Stat och hei d'Rechnung vun der Firma als vun den Steieren oofsetzbar akzeptéiert.

Op däitschen Internetsäiten ass et méi schwierig, konkret Präisser gewuer ze ginn, mee och do géllt awer: De Client brauch sech ëm keng administrativ Démarchen ze këmmen a ka sécher sinn, dass hien regelmäseg Hëllef gelescht kritt, och am Krankheitsfall, an dass déi professionnel Hëllef vun de Steieren kann oofgesat ginn. D'Auswanderen an d'Ausland rentéiert sech also net nëmmen wéinst deenen gënschtege Grondstückspräisser. Oder bréngt Lëtzebuerg et awer nach ronn, ganz séier an allen Hinsichten senge Bierger méi Service unzebidden, fir dass et sech rentéiert, nach hei ze bleiwen? > Lucy Lux